



# IN LINEE IL GNÛF SÎT DE ARLeF


Cun pôcs “clics” al met a disposizion struments tecnologjics e contignûts speciâi pai fruts



Une **navigazion facile e intuitive che e otimize la reperibilitât di informazions e di struments tecnologjics**, une identitât grafiche trative e siore di imagjins, **contignûts speciâi pai fruts. Al è in linie il gnûf sît de ARLeF - Agenzie Regional pe Lenghe Furlane.** Une vore “lizêr” inte strutture grafiche e in version **trilengâl** (furlan, talian e inglès), il gnûf sît al è programât **daûr de tecnologjie “responsive”**, par facilità la navigazion di ogni gjenar di dispositif. Di fat, dutis lis sôs componentis a vegnin ridimensionadis e redistribuidis par jessi dopradis cun ogni gjenar di supuart e, in particolâr, cui *smartphone*. L’acès ai diviers argomenti al è garantît de opzion di ricerce interne che e je une vore svelte.

Cetant impuartante e je la aree **“Struments linguistics”** che e permet di consultâ in linie il Grant Dizionari Bilengâl talian-furlan (plui di 70.000 lemis inte part dal talian, riferîts a 68.000 lemis furlans), e da un acès svelt al Coretôr Ortografic Furlan e al Wopress par furlan e e mostre, ancje miand di un *videotutorial*, l’ûs de Tastiere Furlane Semplice.

La sezion Multimedia e je siore di videos e di audios, libris e audiolibris par fruts, invezit la sezion materiâi e propon une grande siele di tescj pe scuele, pe infanzie e di contignût sociolinguistic. La aree “Progjets” e conte invezit la grande e intense ativitât fate de Agenzie intal setôr linguistic e culturâl. Ogni progjet al è presentât cuntune descrizion detaiade de ativitât e cuntune galarie fotografiche siore.



Un strument inzornât in maniere costante e che al è in evoluzion continue, che al ufris tantis informazions utilis e che **si met al servizi de aministrazion publiche**, miand de clarece in cont dai servizi di toponomastiche, di consulence linguistiche e dai servizi di traduzion che la Agenzie e ufris.

Resultât di un grant lavôr di analisi, di progjetazion e di disvilup dal *software*, il gnûf sît al rapresente un miorament in lui, sedi inte capacitât comunicative sedi inte strutture che e je funzional e acessibile cun facilitât. Al ufris une vision largje de ativitât de ARLeF e ancje des caracteristichis de lenghe furlane.

Se o sês curiôs di viodi cheste gnove version, lait su [www.arlef.it](http://www.arlef.it) e o scuvierzarès un **microcosmi culturâl e linguistic pardabon complet** e che al ufris cetant di cognossi.

